

Genevra e las religiuns

Tge di il pievel ils 10 da favrer?

DA GUIU SOBIELA-CAANITZ

■ **In Svizzer na genevrin distingua tranter il chantun Genevra (495 084 olmas), menziunà dals meds da massa suenter mintga votaziun naziunala, e sia chapitala Genevra (200 485 olmas), il principal center francofon dal pajais. L'art. 3 da la constituziun chantunala, en vigur dapi 2013, di: «L'Etat est laïque. Il ne salue ni ne subventionne aucune activité culturelle. Les autorités entretiennent des relations avec les communautés religieuses.»** Ils 10 da favrer 2019 vuscha il pievel genevrin davart ina nova lescha areguard l'emprim punct da lez artitgel perquai che quatter differentas gruppaziuns han fatg in referendum en chaussa. Cun lezza occasiun ha Christophe Büchi, autur da plis cudeschs davart la Romandia, scrit in essai davart Genevra e las religiuns (1). L'autur scriva: «Il princip da separaziun tranter stadi e baselgia è accumppli a Genevra pli strictamain che tar tut tschels chantuns svizzers. Quai fa smirvegliar (...): I na dat nagin auter chantun svizzer cun in'istorgia colliada uschè stretgamain cun ina confessiun. Pir grazia a la reformaziun è Genevra vegnida ina citad libra, pia in stadi urban suveran (...). L'emprim, durant passa milli onns, è Genevra dentant stada l'impurtanta residenza d'in uvestg. I na fa betg smirvegliar che quel lieu paleoreformà (...) ha mantegnì en sia vopna la regurdientscha da l'uestg, dentant betg cun in fist, mabain cun ina clav cruschada».

Vers il triumf da la reformaziun

Büchi fa lur in sigl fin a las guerras da Burgogna a la fin dal 15avel tschientaner: «L'influenza svizra è sa fatga valair plaun a plaun. Ils Confederads avevan surven-

tschì duca Carl da Burgogna [1433–1477] ed eran vegnids ina pussanza (...). Ad els èn blers Genevrins s'avischinads: I quintavan cun la protecciun svizra per lur citad da commerzi cunter la quaida dal duca da Savoia e dal retg da Frantscha. La partida svizra ha la finala survegnì il suramaun; Genevra è lura s'alliada cun Berna e Friburg (...). La republica da Berna era sa decidida 1528 per la reformaziun. A Genevra ha la sustegnì las fadias en lez senn (...). 1532 è il reformatur franzos Guillaume Farel [1489–1565] (...) vegnì a Genevra nua ch'el ha cumanzà a pregiar la reformaziun. Las autoritads genevrinas han l'emprim manevrà tranter la cretta veglia e la nova; finalmain è la reformaziun sa fatga valair e l'uestg ha bandunà la citad (...). Farel ha incumbensà il giuven reformatur franzos Jean Calvin [1509–1564] da trasformar Genevra en in stadi teocratic reformà (...). La victoria da la reformaziun ha anc rinforzà ils lioms da la citad cun ils chantuns reformads svizzers (...). Lezza è vegnida in refugì dals reformads.»

Da la republica independenta al chantun svizzer

L'enviern 1536 era Genevra bloccada dals aderents da l'uestg e dal duca da Savoia. «Las truppas bernaisas han liberà la citad; lezza ha lura annectà ils vitgs dal conturn. La republica da Genevra è pia stada la successura da l'uestg (...) ed ha institui signurias en las anteriuras domenas episcopalas (...). 1580 è Carl Emanuel [1562–1630] vegnì duca da Savoia. El leva reconquistar Genevra per motivs politics e religios (...). Il december 1602 ha el attatg la citad a l'improvista (Escalade). Sia disfatga è stada cumpleta. La primavaira 1603 ha Genevra attatgà la

Savoia. Il papa, per impedir ina nova guerra europeica, ha fatg pressiun sin il duca. Las tractativas han manà il fanadur 1603 al patg da Saint-Julien; lez reconuscheva implicitamain l'indipendenza e la suveranità da Genevra (...). Pir suenter il temp franzos (1798–1814) ha lezza pudì cuntanscher ina cuntinuitad territoriala cun la Svizra ed in territori unitari (2). Büchi: «Uschia ha Genevra survegnì in'impurtanta minorità catolica (...). Cun l'immigraziun da forzas da lavur franzosas, lur cunzunt friburgaisas e vallesanas, vivevan a Genevra gia amez il 19avel tschientaner dapli persunas catolicas che reformadas (...). Anc oz vegnan las autoritads genevrinas nov elegidas saramentadas en la catedrala da s. Pieder; quai exprima la stretga colliaziun da l'indipendenza statale cun la reformaziun (...). Il 1919 è Genevra vegnida la sedia da la Societad da las naziuns, e quai t.a. perquai ch'il president american Woodrow Wilson (1856–1924) vuleva undrar la citad da Calvin sco center da la reformaziun e da la Crusch cotschna. Uschia è naschida la Genevra internaziunala, actualisada 1945 da la reconuschienscha sco citad da l'ONU. Quai ha midà la maschaida demografica da las minoritads religiusas, (...) moderond la tempra reformada. Tenor ina retschertga da l'Uffizi chantunal da statisticas (2014) sa numnavan mo pli 10% da la populaziun protestants, 43% catolics e 27% senza confessiun.» Co vuschan burgaisas e burgais ils 10 da favrer?

1. Christophe Büchi, Genf – ein Kanton ohne Konfession. En: Neue Zürcher Zeitung (2 da favrer 2019, Turitg), pp. 14–15.

2. Marco Jorio (ed.), Fondazione Dizionario storico della Svizzera, tom 5. Lucarn (Armando Dado), ISBN-13 978-88-8281-200-3) 2006, pp. 490–492, chavazzin Genevra (cantone).